

# **Қўқон уездида пахтачиликнинг ривожланиши масалаларини архив хужжатларида ёритилиши**

**(Колониал давр мисолида)**

**Мирзаев Авазбек Толибжонович**

**Андижон давлат университети**

**мустақил тадқиқотчи-изланувчи**

Ушбу мақолада, Ўзбекистон Республикаси Марказий давлат архиви фондларидағи хужжатлар мисолида Фарғона вилоятининг Қўқон уездида колониал даврда пахтачиликнинг ривожланиши тарихининг айrim масалалари манбашунослик нуқтаи назаридан таҳлил этилган ва ёритилган.

**Калит сўзлар:** волость; ботмон; шира, ўсимлик бити; пахта толаси; маълумот; қадок.

Данной статье, на примере документов фондов Центрального государственного архива Республики Ўзбекистан с источниковедческой точки зрения проанализированы и освещены отдельные вопросы истории развития хлопководства в Коқандском уезде Ферганской области в колониальный период.

**Ключевые слова:** волость; десятина; тля; хлопковое волокно; сведения; фунт.

This article, based on the documents of the funds of the Central State Archive of the Republic of Uzbekistan, analyzed and highlighted some issues of the history of the development of cotton growing in the Kokand district of the Fergana region in the colonial period.

**Key words:** rural municipality; tithe; aphid; cotton fiber; intelligence; lb.

Ўзбекистон халқи мустақилликка эришгач, юртимиз ҳаётининг барча жабҳаларида туб ижобий ўзгаришлар амалга оширилиб, шу қатори, тарих фанида ҳам ўтмишда бўлиб ўтган воқеа-ходисалар холисона ёритила бошланди. Собиқ советлар тузуми даврида Ўзбекистон тарихига бағищланган илмий асарларни яратишда тарихчи олимларнинг ижодкорлигига йул куйилмай факт марксча-ленинча назария нуқтаи назаридан қаралган, аслида эса Ўзбекистон тарихи жаҳон тарихининг ажралмас қисми ҳисобланади.

Мустақил Ўзбекистоннинг тарих фани айрим ҳодисаларни аниқ тарихий шароит билан боғлаб тадқиқ қилишни, далилларни бутунлигича, бир-бирига боғлаб олишни, воқеаларни атрофлича, уларнинг ижобий ва салбий оқибатларини инобатга олган ҳолда ёритишни талаб қилмоқда. Мавзуни ёритиш учун зарур бўлган ҳужжатлар ва материаллар, далиллар ва мисоллар архивлардан, даврий матбуотдан, эълон қилинган манбалардан олинади[1]. Ушбу мақолада, бир қатор илмий адабиётлар ва архив ҳужжатларидағи маълумотларни манбашунослик нуқтаи назаридан таҳлил этиб, мавзуни холисона ёритишга ҳаракат қиласиз.

XIX асрнинг иккинчи ярмида подшо Россияси Марказий Осиёни босиб олди ва Туркистон ўлкасини ўз мустамлакасига айлантирди. Мустамлакачилик даврида тарихий манбаларнинг хили ва тури кўпайди. Туркистонда фаолият кўрсата бошлаган мустамлакачилик маъмуриятининг барча бўғинларида хилма-хил иш юритиш ҳужжатлари яратила бошланди. Қонун чиқариш актлари билан бирга бу ҳужжатлар муҳим тарихий манбалар қаторига киради.

Бу даврда Туркистон ўлкасининг мустамлака мақоми бир неча қонун чиқариш актларида ўз аксини топди. Улар асосан 1865, 1867 ва 1886 йилларда эълон қилинган ўлкани бошқариш ҳақидаги низомлардир. Россия императорлари томонидан тасдиқланган ушбу низомларда Туркистон ўлкасини бошқаришнинг асосий тамойиллари, мустамлакачи маъмурларнинг ваколатлари, маҳаллий халқнинг сиёсий ҳуқуқсизлиги, юртимизнинг метрополия хом ашё базасига айлантирилганлиги ўз аксини топган[2].

Ҳужжатли манбалар тарих фанини ривожлантиришда муҳим аҳамият касб этади. Тарихчилар архив ҳужжатларисиз қимматли далиллар билан асосланган тарихий асарлар яратса олмайдилар[3].

Тадқиқотчи архив ҳужжатларига мурожаат қилганида, кўпинча маълум даражада келгуси ишининг дастлабки асосий концепциясига эга бўлади[4].

Тадқиқот мавзуси бўйича ҳужжатли материаллар белгиланганидан сўнг, уларнинг атрибутацияси, яъни бу ҳужжатларнинг шакли ва

ҳақиқийлиги, уларнинг ёзилган санаси, уларнинг муаллифлари ва адресатларини аниқлаш лозим бўлади[5].

Туркистон ўлкасида ташкил этилган Фарғона вилояти таркибида, генерал-губернаторнинг 1876 йил 6 март кунги бўйруғи билан Қўқон уезди бошлиғи бошқармаси таъсис этилди. Ўзбекистон Республикаси Марказий давлат архивида сақланаётган 300 – фонднинг таркибидаги 283 та йиғма жилд материаллари мазкур бошқарманинг 1876 – 1917 йиллардаги фаолиятига оид бўлиб, ушбу мақолада уезд бўйича пахтачилик соҳасини ривожлантириш юзасидан амалга оширилган чора – тадбирларга доир ҳужжатли маълумотлар манбашунослик нуқтаи назаридан таҳлил этилади. Фонддаги айrim ҳужжатларда, пахта тозалаш заводларидан земство учун 2 фоизли йиғимларни ундириш, кўчмас мол-мулклар тўғрисидаги маълумотлар акс этган[6].

Маълумки, уездлар бир неча участкаларга ва волостларга бўлинган. Масалан, Қўқон уезди: 1. Шаҳар атрофи участкаси - унинг таркибида Аравон, Ганжиравон ва Қайнар волостлари бўлган;

2. Кенагас участкаси - унинг таркибида Кенагас, Қудаш, Чирик Жийда, Жанжал, Қипчоқ ва Қорақалпоқ волостлари бўлган;

3. Бачқир участкаси – унинг таркибида Сўх, Риштон, Зодиён, Ултарма, Бувайда ва Найман волостлари бўлган;

4. Конибодом участкаси – унинг таркибида Найгут, Кипчоқ, Лайлак, Исфара, Конибодом, Яйпан, Бешариқ ва Маҳрам волостлари бўлган[7].

Фарғона вилоятининг Қўқон уездида колониал даврда пахтачиликнинг ривожланиши, хусусан пахта экини майдонларини кенгайиб бориши масалалари, Туркистон ўлкаси Дехқончилик ва Давлат мулклари бошқармасининг 7- фонди архив материалларида ҳам кенг ёритилган. Масалан, Қўқон уездида 1901 йилда 29. 845 десятинага пахта экилган бўлса, 1902 йилда водийда об-ҳаво серёмғир бўлгани учун уездда 22.300 десятинага

пахта экилган бўлса[8], 1903 йилдан эса пахта майдонлари яна кенгайиб бориб, 23. 245 десятинага америка навли пахта, 8558 десятинага эса маҳаллий навли пахта экилган[9]. 1902 йилда Фарғона вилоятида жами 115 та пахта тозалаш заводлари бўлиб, улардан 24 таси Кўқон уездидан жойлашган эди[10].

Кўқон уезди Давлат мулклари мудири томонидан, 1904 йил 1-декабргача Кўқон уездидан пахтачиликнинг ҳолати тўғрисида тузилган маълумотноманинг нусхасида, жорий йилда пахта терими сентябрнинг иккинчи ярмида бошланиб ноябрь ойи бошларида якунлангани, давлатга қарашли ерларда бир десятинадан, ўртacha, америка навли пахтадан 43 пуддан, маҳаллий нав пахтадан эса 30 пуддан ҳосил олингани, уездда 25 та пахта тозалаш заводлари мавжудлиги, америка навли бир пуд пахта хом ашёсини нархи 1 нав учун 2 руб. 70 коп., 2 нав учун 2 руб. 50 коп., 3 нав учун 1 руб., 80 коп., маҳаллий нав пахта учун эса 2 руб. этиб белгиланган[11].

1905 йилда Фарғона вилоятида 162.626 десятинага пахта экилиб, бундан Кўқон уездидан 29797 десятинани, шундан 23453 десятина америка навли, 5944 десятина эса маҳаллий нав пахтани ташкил этган[12].

1906 йилда Фарғона вилоятида 175.068 десятинага пахта экилиб, жумладан, Кўқон уездидан 34898 десятинани, бундан 28277 десятина америка навли, 6621 десятина эса маҳаллий нав пахта майдонларидан иборат бўлиб, давлатга қарашли ерларда бир десятинадан, америка навли пахтадан ўртacha 43 пуддан, маҳаллий нав пахтадан эса 30 пуддан ҳосил олинган[13].

1907 йилда Фарғона вилоятида пахта майдонлари 191.957 десятинани ташкил этиб, шундан, Кўқон уезди ҳиссасига 32250 десятина тўғри келган, бир пуд пахта хом ашёсини нархи 3 руб. дан то 3 руб. 70 коп. гача ва пахтанинг соф толасини нархи 11 руб. 50 коп. дан то 12 руб. гача бўлган[14].

Кўқон уезди Давлат мулклари мудири Д. Колтановский томонидан, 1907 йил 1-сентябргача Кўқон уездидан пахтачиликнинг ҳолати тўғрисида тузилган маълумотноманинг нусхасида, Риштон ва Ултарма волостларида,

шунингдек, Кўқон шаҳрининг атрофидаги волостлардаги участкаларда ғўзани гуллаши ва ўсиши қониқарли ҳолатда экани, айниқса уезднинг шарқий қисмидаги Сўх сойидан, шунингдек, ғарбий қисмидаги Исфара сойдан сув оладиган, уезднинг бошқа худудларида, ғўзани суғориш учун сув танқислиги жиддий тарзда сезилгани, чигит апрелнинг охирларида униб чиққани, июнь ойи охиридан эса ғўза гуллай бошлагани, асосан Кенагас волостида ва уезднинг бошқа худудларини 400 десятинага яқин айрим жойларида, ғўза кўсагининг “шира” касаллигига чалингани қайд этилган[15].

Кўқон уезди Давлат мулклари мудири Д. Колтановский томонидан, 1907 йил 1-декабргача Кўқон уездида пахтачиликнинг ҳолати тўғрисида тузилган маълумотноманинг нусхасида, жорий йилда об-ҳаво қулай келгани туфайли пахта терими 10-сентябрдан бошлангани, 24-ноябрдан совук ва ёмғирли об-ҳаво тургани сабабли, пахтанинг биринчи терими ўз вақтида якунланмаган, иккинчи ва учинчи пахта теримлари пайтида ҳам шу ҳолат сақланиб қолган, давлатга қарашли ерларда бир десятинадан, ўртacha, америка навли пахтадан 50 дан 80 пудгача, маҳаллий нав пахтадан эса 35 дан 50 пудгача ҳосил олингани, уездда 25 та пахта тозалаш заводлари мавжудлиги баён этилган. Пахта толаси масаласида эса, 3 пуд 12 фунт 1-терим пахтадан, 3 пуд 14 фунт – 3 пуд 17 фунт 2-терим пахтадан, 3 пуд 18 фунт – 3 пуд 20 фунт 3-терим пахтадан бир пуддан соф тола олинган. Пахтанинг нархи ҳақида эса, америка навли бир пуд пахта хом ашёсининг нархи 3 руб. 80 коп. дан – 4 рублгача, бир пуд пахта толасининг нархи 12 руб. 20 коп.дан то 13 рублгача бўлган. Уезд бўйича пахта заводларида жами 1340000 пудгача чигитлар олиниб, шу миқдорнинг 1/3 қисми ёғ маҳсулоти олиш учун сарфланган, 120000 пуд чигит эса уезддан ташқарига чиқарилган[16].

Фарғона вилояти ҳарбий губернаторининг ёрдамчиси номидан 1910 йил 13 сентябрда № 3907 чиқиши раками билан қайд этилиб Скобелев шаҳридан жўнатилган 1909 йилда вилоят бўйича пахтачиликнинг ҳолати тўғрисидаги маълумот, Туркистон ўлкаси Дехқончилик ва Давлат мулклари

бошқармасида 1910 йил 4-октябрда № 2058 рақами билан кириш ҳужжатлари журналида рўйхатга олинган. Мазкур ҳужжатда кўрсатилишича, 1909 йилда Кўқон уездидаги пахта экини майдонларининг ҳажми жами 37322 десятина бўлиб, шундан 31517 десятинани америка навли, 5805 десятинани маҳаллий навли пахта ташкил этган. 1909 йилда уезд бўйича териб олинган пахта хом ашёси жами 2493515 пуд бўлиб, бундан америка навли пахта 2155087 пудни, маҳаллий навли пахта эса 338428 пудни ташкил этгани ҳолда улардан умумий 7667755 пуд пахта толаси олинган[17].

Хулоса ўрнида таъкидлаш мумкинки, Ўзбекистон Республикаси Марказий давлат архивининг 7–фонди ва 19–фондида сакланаётган ҳужжатларнинг манбашунослик нуқтаи назардан таҳлили, келгусида Россия империясининг мустамлакачилиги даврида Туркистон ўлкасида, жумладан, Фарғона вилоятининг Кўқон уездидаги пахтачиликнинг ривожланиши жараёни тарихини ўрганишда муҳим манба ҳисобланади.

Фойдаланилган адабиётлар ва манбалар:

1. Алимов И.А. Архившунослик. Ўқув қўлланма. Андижон, 2005, 83 – бет.
2. Хошимов С.А, Расулов Б.М, Хакимов А.А. МАНБАШУНОСЛИК, Тошкент, 2014, 116-117 бетлар.
3. Бобоқулов Б. Архив иши назарияси ва амалиёти. Ўқув қўлланма. – Т.: «Сано-стандарт» нашриёти, 2011, 68-бет.
4. Шепелев Л.Е. Работа исследователя с архивными документами. Издательство «НАУКА», Москва, 1966, с.90.
5. Горфейн Г.М., Шепелев Л.Е. Архивоведение. Учебное пособие. Издательство ЛГУ, 1971, с.66.
6. Путеводитель. Центральный государственный исторический архив Уз ССР(Центральный государственный архив Республики Узбекистан). Составители: З.И.Агафонова, Н.А.Халфин. – Т.: 1948, с.51.
7. Шарафиддинов А. Фарғона вилояти тарихидан лавҳалар ( XIX аср охири – XX аср бошлари). Тошкент, “Наврўз”, 2013, 14-15 бетлар.

8. ЎзР МДА Фонд И-7, 1-рўйхат, 2468-иш, 85-варак.
9. ЎзР МДА Фонд И-7, 1-рўйхат, 2559-иш, 35-варак.
10. ЎзР МДА Фонд И-7, 1-рўйхат, 2559-иш, 3-3 об. вараклар.
11. ЎзР МДА Фонд И-7, 1-рўйхат, 2560-иш, 53-варак.
12. ЎзР МДА Фонд И-7, 1-рўйхат, 2729-иш, 14-варак.
13. ЎзР МДА Фонд И-7, 1-рўйхат, 2790-иш, 18,72-вараклар.
14. ЎзР МДА Фонд И-7, 1-рўйхат, 2857-иш, 19-19 об. вараклар.
15. ЎзР МДА Фонд И-7, 1-рўйхат, 2857-иш, 71-варак.
16. ЎзР МДА Фонд И-7, 1-рўйхат, 2857-иш, 116-116 об. вараклар.
17. ЎзР МДА Фонд И-7, 1-рўйхат, 3030-иш, 82-варак.